

## ‘NA LACRIMA RUSSA

‘A turtura  
agghiri ô suli abbola mentri agghiòrna  
e, sacuiènnu nu raju,  
nô cielu scurri  
e ci fa nu ratapuntu.

‘U cacciaturi  
sparannu contra ô suli,  
ci tagghia ‘u filu,  
e cu cientu ‘nnàccari  
ci arriccàma ‘n’accièttu,  
ri unni si sbuttùna,  
ancora càuru,  
‘n sciùsciu ri vita,  
l’ùrtimu.

‘I so pinni  
sunu ‘i pàmmini ‘i ‘na rosa  
ca abbrìzzunu,  
cuannu ci runi ‘n’azziccuni.

Cariennu, ‘a ‘nnuccintula,  
trova sulu l’ùm’ra so, ca si l’accògghi  
e ‘a tinci cu ‘na lacrima russa,  
e ci cunfira l’ùrtimu pi-più.